

Nowodhow an Seythen

(<http://radyo.kernewegva.com/>)

Titel: Nowodhow an seythen (15/04/08)

Auctour: Matthew Clarke

Dydh: 15 Ebryl 2008

Pesyans: 8:30

Trist on derivas mernans den meur y vri y'n taves Kernewek.

Ray Edwards a verwis an nessa a vis Ebryl dre ganker. Teyr-bloodh-ha peswar-ugens ova.

Ev a dhalathas dyski Kernewek mil-naw-kans-ha-peswar-ugens wosa omdenna avel dyskador yethow. Ev a sewennas y apposyans Peswara Gradh ha dos ha bos bardh mil-naw-kans-diw-ha-peswar-ugens. Nessa bledhen hag y teuth gorhemmyn dhyworth *Kesva an Taves* a ordena studhyans dre bost... hag ena veu genys *Kernewek Dre Lyther*, neb a bes hedhyw.

Ny vien vy omma ow kewsel dhywgh hedhyw yn Kernewek hebdho, drefenn my dhe dhyski meur a'n taves ganso.

Symon Harner o dyskibel Ray ynwedh... hag ena y holya a-vel ordenor *Kernewek Dre Lyther* rag lies blydhen.

Ottomma kanmeula Symon...

<Symon>

Jori Ansell yw kyns bardh meur hag esel *Kesva an Taves*...

<Jori>

Y fydh gonis an peswara-warn-ugens a'n mis ma dhe Sutton Coldfield Crematorium.

An kaskyrgh rag lesa aswonnvos a wiryow Kernow res eth a-hys Breten Veur y'n Sunday Times. An paper nowodhow a dhellos erthygel ow kewsel nebes a'gan istori, ha'n Lu Rydhsys Kenedhel Kernow, keffrys ha nebes a-dro dhe'n taves.

Heveli dhe'n studh yn Kembra a wrug an erthygel, ha dre vras skrifys yn ta o. Yth esa niver a gammow... martesen an brassa o leverel bos agan baner arghans ha du, y'n le a wynn ha du.

An dydhlyver leun a guntelesow keskusulya re besyas yn unn assaya kavos furv skrifys sodhogyl. *Nowodhow an Seythen* re wovynnas rag keswel dhyworth sodhva an taves may hyllyn godhvos moy a'n pyth eus ow hwarvos. An sodhva re ambosas keswel genev an

seythen ma... ha govenek a'm beus a'y dhyлло nessa seythen.

Mars eus hwans dhywgh a wovynn neppyth orth Jenefer Lowe a-dro dhe'n FSS, gwrewgh dannvon agas govynnow dhymmo vy... orth pennlorwydh@kernevegva.com

An niverow drog-oberennow rag Kernow yw dyllys.

Warlyna, kodha a wrug drog-ober yn ogas ha pub rann. Kekeffrys ha henna, yma moy ahanan ow terivas drog-oberow.

Rygbi lemmyn...

Ha'n Oll-Duyon re grevhas aga thyller yn Kenedhlek Onan wosa fetha Moseley dewdhek poynt erbynn deg.

Nyns esa gwari dhe'n Vorladron an seythen ma.

Kenedhlek Dew... ha Rysrudh a gollas erbynn Manchester.

An Rudhyon a gavas marnas deg poynt... ha'n vysytoryon eth tre gans dew-ha-dew-ugens.

Hag y fydh para Kernewek nowydh yn Kenedhlek dew nessa seson.

Kammas an Garrek re gavas avonsyans dhyworth Kenedhlek Tri Soth.

Hemm yw warlergh an fit an bennseythen ma pan fethsens Cinderford.

An skor ena o eth-poynt-warn-ugens dhe ugens.